



Քաղաքացիական գործ
թիվ ՇԴ/4772/02/16

Ո Ր Ո Շ ՈՒ Մ

Ապացուցման պարտականությունը բաշխելու մասին

2023թ. հոկտեմբերի 05-ին

ՀՀ ՍՆԱՆԿՈՒԹՅԱՆ ԴԱՏԱՐԱՆԸ

նախագահությամբ՝ դատավոր Արմեն Խաչատրյանի

Դռնբաց դատական նիստում, քննելով քաղաքացիական գործն ըստ հայցի Ավագ Արտուշի Հովհաննիսյանի ընդդեմ Նինա Ալեքսանդրովնա Գևորգյանի, վեճի առարկայի նկատմամբ ինքնուրույն պահանջ չներկայացնող երրորդ անձ Ջիվան Մելիքի Բալբաբյանի՝ գործարքը վավեր ճանաչելու պահանջի մասին, քննարկելով ապացուցման պարտականությունը գործին մասնակցող անձանց միջև բաշխելու հարցը.

Պ Ա Ր Զ Ե Ց

Հայցվոր Ավագ Արտուշի Հովհաննիսյանը 11.10.2016թ. հայցադիմում է ներկայացրել ՀՀ Շիրակի մարզի առաջին ատյանի ընդհանուր իրավասության դատարան ընդդեմ Նինա Ալեքսանդրովնա Գևորգյանի՝ գործարքը վավեր ճանաչելու և որպես բարեխիղճ ձեռք բերող անշարժ գույքի նկատմամբ սեփականության իրավունքը ճանաչելու պահանջով: Նույն դատարանի (դատավոր Մ.Գևորգյան) 12.10.2016թ. որոշմամբ հայցադիմումն ընդունվել է վարույթ և գործը նախապատրաստվել է դատաքննության:

ՀՀ Շիրակի մարզի առաջին ատյանի ընդհանուր իրավասության դատարանի 12.10.2016թ. որոշմամբ բավարարվել է հայցվորի միջնորդությունը՝ հայցի ապահովում կիրառելու վերաբերյալ, և արգելանք է դրվել ՀՀ, Շիրակի մարզի Գյումրի քաղաքի Ա.Խաչատրյան փողոցի 29 շենքի թիվ 43 հասցեի բնակարանի նկատմամբ:

Նույն դատարանի կողմից 20.06.2017թ. կայացված վճռով հայցը բավարարվել է: Նշված վճիռը բողոքարկվել է գործին մասնակից չդարձած անձ Ջիվան Մելիքի Բալբաբյանի կողմից, և ՀՀ վերաքննիչ քաղաքացիական դատարանի (այսուհետ՝ Վերաքննիչ դատարան) 04.07.2018թ. որոշմամբ վերաքննիչ բողոքը բավարարվել է, ՀՀ Շիրակի մարզի առաջին ատյանի ընդհանուր իրավասության դատարանի կողմից 20.06.2017թ. կայացված վճռը բեկանվել է, գործն ուղարկվել է նույն դատարան՝ ամբողջ ծավալով նոր քննության:

ՀՀ Շիրակի մարզի առաջին ատյանի ընդհանուր իրավասության դատարանի (դատավոր՝ Գ.Հովհաննիսյան) 27.09.2018թ. որոշմամբ սույն քաղաքացիական գործն ընդունվել է վարույթ, և Ջիվան Մելիքի Բալբաբյանը ներգրավել է որպես վեճի առարկայի նկատմամբ ինքնուրույն պահանջ չներկայացնող երրորդ անձ:

